



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3



Jordan indang Prince Hamzah kidang pua lir



Mask inoktsü nungdak mali : Himanta Sarma

VOL. XVIII NO. 170 (ADOK 170) DIMAPUR TENTONÜ (MONDAY) RONGCHII (APRIL) 05, 2021 ₹ 5.00

Nagaland sorkari DTF tem dang COVID-19 tendangtsü tuyur

Dimapur, April 4 (TYO): India nung COVID-19 wara tanaben adoka menatepa aoba mapang ka nung Nagaland sorkari district task force ajak dang COVID-19 sample bendena tendangtsü tetuyuba agütsüogo.

April 3, 2021 nü Directorate of Health and Family Welfare principal director, Dr Kevichusa Medikhru-i iba tetuyuba agütsüogo.

COVID-19 kanga züba menatsüpurtem rongnung shishilembadak tulu nung dokan kiburtem, lenmang nung yokyayokjirtem, bars/taxi/auto rickshaws/rickshaws; restaurant indang drivers/operators aser hotel nung mapa inyaker lir, ta principal director-i metetdaksü.

Maneni, iba telok nungsa reju balala nung tesayurtem/kaketshirtem, hostels/prisons nung

alirtem, office-i aoertertem aser tamangba yimsü lennirtem dena lir, ta paisa ashi.

District task force temi pei pei telongtet nung aliba teloktem aser ketdangsurtem den yaritepa COVID19 tendangtsü metetdaksür, ta Dr Kevichusa Medikhru-isa ashi.

Nagaland Health & Family Welfare department-i Rapid Antigen Test (RAT) agütsü ashi.

"RAT ajanga negative putetertem ano RT-PCR/Truenat ajanga tendangtsüla" ta department-isa metetdaksüogo.

Maneni, mozü ki nung anepalutsü atema aniokba sülen RT-PCR/Truenat tendangtsü atema health department-isa ashi.

"Department-i agütsüba risk groups nungi nisungtem dak tendangbaji angati asütsü" ta parnokisa shisem.

PM Modi-i Covid-19 tensa meyipa reprangshi

New Delhi, April 4 (Agencies): Deobarnü Prime Minister Narendra Modi-i COVID-19 tensa aser vaccine agütsüba maparen meyipa reprangshitsü atema senden ka ayonga menogo.

Iba senden nung principal secretary to PM, cabinet secretary, home secretary, chairperson (Empowered group on Vaccine Administration), secretary health, secretary pharmaceuticals, secretary biotechnology, secretary AYUSH, DG ICMR, principal scientific advisor aser NITI Aayog züngsemtem aden.

Senden nung Prime Minister Modi-i iba wara azüoktsü atema mapa pungu inyakyim inyaktüsü metetdaksü.

"Testing, Tracing, Treatment, Covid-appropriate behaviour aser Vaccination ajanga wara azüoktsü" ta pai ashi.

Senden nung special campaign ka inyaktüsü metetdaksüogo aser ibaji public places /workplaces aser health facilities nung 100% mask usage lir. Iba sentong ya April 6 nungi April 14, 2021 tashi inyaktüsü.

Covid tetuyubatem sülen anidakba den külemi mozü kidang yipden peria ayutsüba, sample tendangtsü aser mapang shitak nung mozü kidang anioka anepalutsü atema PM Modi-i ashi.

Paisa healthcare infrastructure tajungba kümdaktsütsü, mozü ki ajak nung oxygen aser ventilators

peria ayutsü atema tetuyuba agütsü.

Prime Minister-isa Maharashtra, Punjab aser Chhattisgarh state temi central expert teams yoktsü atema tuyu.

India nung tang nisung 6,91,597 dak COVID-19 aliba puteta anepaludar. Deobarnü India nung nisung 93,249 dak COVID-19 aliba putetogo, ta Union health ministry -i metetdaksü.

Tanü putetertem züngsema India nung nisung 1,24,85,509 dak COVID-19 putetogo. Deobarnep tashi nung nisung 513 asüba osang angazükogo aser parnok züngsema linük nung COVID-19 puteter nisung ajak agi 1,64,623 süogo, ta Union health ministry-isa ashi.

Assam Assembly election shilem tasembuba atema nüboyimba temogo

Guwahati, April 4 (Agencies): Assam Assembly election shilem tasembuba atema nüboyimba maparen Deobarnü tembangogo.

April 6 nü Assam assembly election shilem tasembuba nung menden 40 atema tokteptsü.

Iba shilem nung Congress-i aniba Grand Alliance aser BJP-i aniba NDA tsüngda kanga anasatepa tokteptsü.

April 6 nü polling asütsü aliba constituency 40 ya election districts 16 kübok lir. Item assembly menden ya Lower Assam aser Bodoland Territorial Region (BTR) nung lir.

Iba shilem nung BJP-i menden ishika nung dang tokteper aser parnok den yaritepa teloktem nem menden timba lemzütsüogo.

Külen, opposition Congress aser AIUDF-i Assam Assembly election shilem tanabuba aser tasembuba nung menden timba nung takok

angutsü ta ashir.

Election shilem tasembuba nung constituency tongtipangtem:

Jalukbari: Iba constituency nungi Assam Minister Himanta Biswa Sarma tokteper. 2001 küm nungi pai iba constituency nung takok nguyonga arur.

Patacharkuchi: Assam State BJP president Ranjeet Dass-i iba menden nungi tokteper.

Chaygaon: Congress MLA Rekibuddin Ahmed-i Chaygaon nungi maneni tokteper. Pai AGP candidate Dr Kamala Kanta Kalita den tokteper.

Sarukhetri: Kalpana Patowary-i AGP ticket amer Congress MLA Jakir Hussain Sikdar den tokteper.

Chapaguri: Sahitya Academy Award angur Urkhao Gwra Brahma-i UPPL ticket amer tokteper. UPPL ya BJP den tesentaktep lir.

BJP lennir Sarma-i mask meinoktsü jembiba aitsür

Guwahati, April 4 (Agencies): Assam minister aser BJP lennir Himanta Biswa Sarma-i 'mask enoktsü nungdak mali' ta jembiba atema nisungtemi aitsür.

Sarma ya Assam nung Health Minister lir aser pai iba olen jembiba atema political party temi dang masü saka public-ia aitsür.

"Assam nung Covid mali. Tang asenoki rongsenkettsüng shia arudaktsütsü atema inyaker. Asenoki mask enokra, beauty parlours nung koma mapa inyaktüsü? Nungdak-a ta asüadang ni nübertem dang mask enoktsü ashitsü" ta Sarma-i osangbener dang ashi.

India nung nisung 90,000 jungnüa dak Covid-19 aliba

putetba anogo ka nung Assam BJP lennir Sarma-i iba olen ya jembiba.

Assam nung April 4, 2021 tashi nung Covid-19 puteta anepalur nisung 1,945 lir.

Himanta Biswa Sarma aitsürtem rongnung Shiv Sena lennir Priyanka Chaturvedi dena lir.

"Linük nung mesüra alima nung Health Minister kati COVID mali ta sangdongbaji iba ya mezüng lir. Pai (Sarma) masks meinoktsü mesüra Covid inyakyim sülen manidaktsü atema shiogo. Asenok ajaki iba takok atema tenüngsang agütsütsüla aser World Health Organization (WHO) dang pusema nungittsü ashitsüla" ta Priyanka

Chaturvedi-i metetdaksü.

Centre sorkari COVID-19 azüoktsü atema face mask enoktsü aser nisung o nisung tsüngda tepila ayutsü tetuyuba agütsüogo saka Sarma-i iba anema jembio.

Assam nung COVID-19 menatepa aoba azüokba atema nisungtemi tenüngsang agütsüogo. Ajisüaka, tang Assembly election agiba mapang ka nung nisung meyirjang aika mask meinoki aser tepila meyui telok adenshitepa atema tebilemstü abener.

Tarutsü hoptatem Assam nung nisung aika dak COVID-19 aliba putettsü akok ta nisungtemi tsüba bilemteper.

Myanmar nung Easter entsü amshia lungkak ait



New Delhi, April 4 (Agencies): Myanmar nung mitkartem anema lungkak aitertertem Easter Sunday nung entsü nung noksa yanglur lungkak aitogo.

February 1, 2021 nü Myanmar nung mitkartem civilian lennir Aung San Suu Kyi-i aniba sorkar

atsüngdokba sülen tensa kanga mejungi kümter lir.

Tanü mitkar yimsüsüba anema noktakertertemi linük kübok tesem ajungalen Easter Sunday tenüng nung entsütem nung noksa balala yanglur yimdong nung lungkak aita liasü.

Yangon nung nisung telok kati Insein district ajanga lungkak aita kentem atenba den "Spring Revolution" nung ajemdaker entsütem bener senzü.

Entsü aika nung February 1 nü sorkar atsüngdokba anema noktakba tamaittsü 'three-fingered salute' yangluloka liasü.

Security forces-i lungkak aitertertem tashiyim agi azüoktsü meranger aser Honibar tashi nung lungkak aiter 557 shi tepsetogo, ta Assistance Association for Political Prisoners (AAPP)-i metetdaksü.

Easter Sunday den külemi Myanmar nung lungkak aitertertemi tanü noksa balala yangluba entsütem kidanger kishitem nung yutsü.

Entsü amshia lungkak aita pusemba Facebook telok kati nübertem dang Easter Sunday nung Khristantem indang sobaliba akhümsütsü ayongzüka liasü.

Myanmar kübok tesem balala nung civilian 2,658 shi ka tepuokdak yua lir, ta AAPP-i ashi.

Taoba hopta Myanmar ketdangsurtemi celebrity 49 aputsü atema 'arrest warrants' agütsüogo. Item celebrity timba ka atsüka lir.

Adianutsür ana- Shine Ya Da Na Pyo aser Nay Zar Chi Shine nati Hokolbarnü CNN osangbener ka den sensaksema liasü aser iba atema sepaitemi tena den ano kinunger ka puogo.

Parnoki CNN osangbener den jembidang 'three-finger salute' agütsü ta local media-i ashi.

Honibarnü Myanmar nung telungpur telok 10 tsüngda online nung sensaksemogo. Iba ajanga linük nung tensa tamajungba akümsü akok ta tsübuteper.

Myanmar nung telungpur telok 20 shi kati tesem aika amokbanga ketdangtsüa arur. Parnoki ketdangtsüba tesem timbaka arstsülen lir.

Taoba hopta Myanmar mitkartem telungpur teloktem den ita ka ceasefire aliba osang metetdaksüogo. Ajisüaka, mitkartem lungkak aitertertem

dakbo tashiyim mapa inyakba manener.

Deobarnü Myanmar nung "Easter Egg Strike" ayonga magidang "Flower Strike" aser "Silent Strike" ayonga agiogo.

"Flower Strike" mapang lungkak aitertertem security forces-i tepsetertem nemtetushi agüja public tesentem nung naroyutsü. Maneni, "Silent Strike" nung parnoki yimdong tazüng kümdaktsü.

Myanmar nung sepaitemi sensotem tsübudaktsütsü atema mapa inyaker. Honibar aonung Yangon nung alir kati video ka tangokba nung sepaitem aser police telok kati aonung ki aika nung lijak agi lung khaloktsüba lir.

Honibarnü police-i Myanmar tiyongtsülen aliba Monywa nung lungkak aitertertem dak injang khaloktsüdang nisung aika khasetogo.

Myanmar mitkartem internet timba noktanga lir aser iba jagi nübertem alima dang parnok timtemba mesayuteter aser meshiteter.

Wb.Chubatemjen Ao-i Laishiba ajunga anaben zülumaogo



April 04,2021 nikongdang Wb.Chubatemjen Ao-i pai pa teka agi Laishiba Lipok nungi Jungkai Adok tashi zülumaba indang lemsatepba noksa nung angur. Iba sentong ya par kidang pai mulungdoka alir yimten aser arogo lenirtem kar jaoka agia liasü. Tamalen pai Ao Laishiba ajak register temelem pezü nung zülüoka lir aser tang ya pai King James Version Laishiba nungi ajizüka English agi zülü. Wb.Chubatemjen Ao ya tamalen Nagaland nung minister liasü. (Dimapur, April 04, 2021.)

Dimapur, April 04 (TYO) : January nungi tenzükba 1999 Nagaland nung taoba kilonser (minister), Wb.Chubatemjen Ao-i pa teka agi Laishiba nung Lipok nungi Jungkai adok kaket tashi, tamasa Ao oshi nung aser tang English oshi nung ta anaben zülumaba atema Tsüngrem nem tenüng agütsüba sentong ka, tanü amongnü yangi Diphupar nung par kidang agiogo.

Pai tamasa Ao oshi nung Laishiba ajunga pa teka agi register tulu pezü nung zülüoka toktsüba mapaji, 1996 kum

January nungi tenzükba 1999 kum December nung züluma. "Iba mapa ya ne kum pongo nung renemtsü apuso saka kum pezü nung temadok," ta tanü sentong nung jembidang Wb.Chubatemjen Ao-i metetdaksü.

Iba sülen, yaküm kum 2020 nung pa tasoba kum 75 ajungba tenüng kasa temeshi Laishiba ajunga English nung zülutsü apusoba pen 197 tashi agimaa zülur, kum ka tsüngdasa züluma ta paisa ashi. Pai English Laishiba ya register tululu asem

tashi nung zülüoka lir. Iba Laishiba züluba mapang pa amenba mendenji, mashi menden ka masü, taoba Nagaland Development Commissioner, Wb.Sashimereni pa amenba menden pa nem agütsüba nung mener zülü ta Wb.Chubatemjen Aoi kanga temulung chia ashi.

Pai ajizüka zülüoka toktsüba Laishibaji America nunger yimten nüchiso ngur kum 200 ajungbamong 1976 kum adokba King James Version Laishiba liasü.

Dy. CM ajanga H. Chuba Chang nem tenüngsang agütsü

Dimapur, Rongchii/April 04 (TYO): 51 Noksen Assembly Constituency nüburtemi Nagaland Legislative Assembly dangi takotet yimten yimsüsür H. Chuba Chang (PDA ajanga molungtepa shimtetba candidate) yokba asoshi kanga pelar, ta Nagaland Deputy Chief Minister aser BLP lenir Y. Patton-i sangdong ka ajanga ashi.

Taoba mapang sorkar

tenzükba wadang nung ketdangsür mapa inyaka alisang aser yimten yimsüsüba nung taoba mapang külemi inyaka alisang ya NLA züngsem ama ponguben buba tenzüksü, aser Nagaland yimtenren nung pai ajangshia aliba ya senti oset amai lir, ta Patton-i ashi.

Nükla tajung aliba lenir, Chief Minister Neiphiu Rio lenisüba kübok PDA sorkari

state atema tajungtiba nung yimsü asütsü aser terenlok bener arutsütsü asoshi nendaka inyaker, ta Patton-i ashi.

Tetokteper shinga melie shimtetba asoshi state BJP legislature tenüng nung H. Chuba Chang nem tenüngsang agütsür aser pa aliba ajanga nüburtem ajangzüksü aser PDA sorkar tashi taitba akumtsü imla atar, ta Deputy Chief Minister-isa ashi.

New Creation Theological Seminary ajanga DHD semdang



Dimapur, Rongchii/April 04 (TYO): Easter anogo tenüng nung New Creation Theological Seminary Dimapur principal-i anir kaketshirtemi April 4, 2021 nü District Hospital Dimapur semdanga shrianger, doctor, nurse aser yangji inyakerterem nem sempet agüja liasü.

Iba sentong ya theology azünger aser shirangertem asoshi tenük lapokba mapang ka liasü.

Mozüki ketdangsürtemi ajaklen awajema ketdangsüba, ki-o-jen junga anepaluba aser mozüki telung aser temeket müreka anepaluba ngua

tesemdangertem temoatsü angu, ta New Ceation Theological Seminary indang director-i sangdong ka ajanga ashi.

Temeim agi sünga aliba doctor, nurse aser staff tem den sensaksema temoatsü angu, ta pai ashi.

NSCN/GPRN ajanga asükhu lemsatep

Dimapur, Rongchii/April 04 (TYO): Anojungi April 3, 2021 nü Huthrong Brigade, Naga Army nungi Captain Paul Charenamai asüba asoshi Government of the People's Republic of Nagalim (GPRN) mang ayimer, ta sangdong ka ajanga ashi. Asür Charenamai ya Makuilongdi Region kübok Thonglang yimtsüng nungi lir. Pa Naga linük tenzükba wadang nung October 05, 1999 nü tenüng zülüoka liasü.

Pa asünü tashi linük meimba molungsentsü dener Naga lima tenzükba liasü. Pa asüba ajanga tawa adokdaksüba kanga jangja metettsü aser iba tawa asüngtsü tasak alitsü. Pai Naga lima asoshi anibelem mesasai shilem agiba atema pa tenüng

Naga nunger puti otsü nung teti alitsü aser Naga nungeri pa kodanga mamadoktsü, ta sangdong ajanga ashi.

Pai Naga lima tenzükba asoshi tetushi agüja, Office of the Longvibu, Naga Army ajanga pa nem April 3, 2021 nü Major jenjang agütsüogo.

Asür Major Paul Charenamai indang kinungertem den NSCN/GPRN ajanga asükhu lemsateper. Iba ama mangyim tejashi nung alidang Tulusang Tsüngremi asür kinunger nem anisüngzük aser tashi tasen agüjangma, aser asür tanüla teti tatem maka tesunep nung anisüngzükjang, ta sarasademtsür, ta kasa sangdong ajangasa ashi.

KLBC pur Easter Sunday mungogo



Kohima Liangmai Baptist Church nung tenzüklatemi April 4, 2021 nü Easter Sunday sentong nung temeja ken ka atenba noksa nung angur.

Dimapur, Rongchii/April 04 (TYO): Kohima Liangmai Baptist Church D. Block puri Yisu tasü madak takok ngur shia aruba anogomung nung April 4, 2021 nü tekülem kidang sentong tajung ka agia liasü.

Iba sentong nung Rev. Pastor N. Silubo Zeliang ajanga Tsüngrem o jemi aser arogopur ayongzüka liasü.

Easter ya Tsüngrem dak amanga sarasademba, tatok meshiba aser Pa majuru tashi asen takum nung Pa temeim, temoatsü meshiba mapang ka lir,

ta Rev. Silubo Zeliang-i ashi.

Yisu sür shia aruba ajanga temenen molungsentsü ajunga samadaksü, asen takum nung tetsükdaksü ajunga agientsü aser Pa sür shia aruba ajanga asen takum dangi temoatsü bener arutsür aser Easter ajanga asenok nem teimla agütsür aser takum aika melenshitsü, ta paisa ashi.

Iba anogo nung Kohima Liangmai Baptist Church ajanga Nagaland Baptist Church Council (NBCC) asoshia sarasademja liasü.

ULFA (I) ajanga Quippo nung inyaker ya chioktsüla: PFFA

Guwahati, Rongchii/April 04 (Agencies): ULFA (I) ajanga Quippo Oil and Gas Infrastructure Limited nung inyaker Ram Kumar mechioki aliba asoshi Patriotic People's Front Assam (PPFA) ajanga süoki ia bilemstüba osang ka Deobarnü sangdonga liasü.

ULFA (I) ajanga Quippo nung inyaker Pranab Kumar Gogoi ita asem tashi pua yur Honibarnü Arunachal Pradesh kübok Changlang nung chioka liasü.

Kumar chioktsü atema telungpuri osang sangdonga mali, ta PFFA ajanga khuret bena lemsatep, shiba Bihar nungi lir.

Telungpuri aginüba ama company den jembishinüba sülen tenaprong ya kasa anogo chioktsü imla liasü, saka Gogoi dang Assam kübok Sivasagar district nung par kidangi meyipa shilang.

Senotsü meshitsü mechi ULFA (I) züngsemtemi tena ya taoba ita December 21 nü

Arunachal Pradesh indang Changlang district kübok Dayun Khumsai drilling area nungi pua bener oa liasü.

"Iba tensa nung Ram Kumar ya timtem ajurur ka asünungbo kanga tia maka asütsü aser pa tekeratiba nung timi chioktsü asoshi asenoki ola madokra otsüi Assam nübur dang kodanga tatok magütsütsü," ta PFFA ajanga sangdong ka nung ashi.

"Pa asoshi ketdangsür, civil society telok aser nübur ajunga nokdaksüla," ta sangdong ajangasa ashi.

Quippo nung inyaker anaprong ya parnok ket nung lir ta ULFA (I) tekolakba, Paresh Barua-i January 12 nü nangzüka liasü.

Northeast nungi ali rongsen agitetba atema par telok lemzükba sen company-i magütsüra parnok anema mera agitsü, ta Barua-isa amokmerena liasü.

Aser item rongnung Kumar ya mezüngbuba asütsü, ta pai ashi.



XIIIth Kingfisher Miss Arunachal Pageant 2021 takok angur Tengam Celine Koyu (abelen) den runner-up Riyya Riba aser second runner-up Hibu Abyang nungertem agiba noksa angur. Iba sentong ya Honibar nikongdang Pasighat nung ayonga agi aser Arunachal Pradesh chief minister Pema Khandu-ia aden. XIIIth Kingfisher Miss Arunachal Pageant nung takok angur Tengam Celine Koyu-i Miss Femina Miss India nung Arunachal state tenüng nung tokteptsü.

Mask inoktsü nüngdak mali: Himanta Sarma

Guwahati, April 4 (Agencies): Covid-19 nungi jenbitsü atema tekümdangtsü mera agir ama State nung alir nüburtemi mask inoktsü menügdaker kechiyong Assam nung iba tesashi wara joko mali, ta Assam health minister Himanta Biswa Sarma-i metetdaksüogo.

Tejak nung mask inoktsü, teka metsüksü aser nisung o nisung tepila ayutsü asoshi Center sorkari tetuyuba agütsür aliba mapang ka nung minister Sarma-i, Assam nung Covid-19 wara samar aliba mapang ka nung kechiba nüburi mask inoktsüla aser aoksatsüla ta ashi.

India nung Covid-19 wara tanaben adoka tashidak tasen aika putetba den nisung asüba tensa ajangshia aruba mapang ka nung Sarma-i iba osang sangoktsüogo.

Honibarnü India nung nisung 90,000 jungnüa dak Covid-19 tashidak tasen putet liasü, koba ita trok nung iba anogo linük nung tashidak puteter timtiba alitsü.

The Lallantop' den interview

agiba mapang Sarma-i iba olen metetdaksü.

Centre sorkari nüburtedang dang teti mask inoktsü asoshi nenshia metetdaksüba mapang, Sarma-i jembizüka yokba o ya Center anema inyaker ama lir.

Ajisüaka, Sarma-i "Centre-i teinyaktsü aser tetuyuba balala agütsütsü akok, saka tawa tanü Assam telongtet nungbo Covid-19 wara mali. State nung Covid-19 wara tanaben adokra ni nüburtedang dang mask inoktsü asoshi ashitsü" ta telangzüba agütsüogo.

State balala nung Covid-19 dak sendakba tenokdangbatem aliyongjia kechiba mask meinoktsüla ta nai bilemer ta Sarma dang asüngdangba mapang, "Mask inoktsü nüngdak melira, ni kechi sütsütsü?" ta pai langzü.

"Nüburtedang dang inokra, beauty parlour tem koma achaayangtsü?" ta Sarma-isa ashi.

"Beauty parlour tem lapoka teinyaktsü tim inyaktsüla. Aji asünung, ibaji mapang tatsüka asoshi anisüngzüik ta nüburtedang shiogo. Covid-19 wara lendongbang tensa ajurutsüsa kümra, idangjisa nüburtedang dang mask inoktsü asoshi tetuyuba agütsütsü. Iba temzüng nung aibelenertedang dang senchi sen 500 agütsü," ta minister-i ashi.

Assam nung nüburtedang mask meinoktsü asoshi State indang health minister ka ama mongin nisungtem dang asüngdangyaa inyaker asü mesüra administrator ka ama jembir ta asüngdangba mapang Sarma-i, "mask inoktsü/meinoktsü asoshi mongintem dang asüngdangyatsü menügdak" ta langzü.

"Mongin nisungtem dang asüngdangyatsü menügdaker. Küm ka tashi asenok Covid-19 wara den külemi lia aruogo. Ozüng yanglushiba ya anisüngzüka lir. Iba ya mapang tatsüka den külemi teti atema anisüngzüik alitsü akok. Anogo nung nisung 100 dak tema iba tashidak putet nungang, onoki press conference ayongzüka aser nüburtedang dang tanaben mask inoktsü asoshi tetuyuba agütsütsü," ta Sarma-isa ashi.

Congress-i Assam CEO dang Tamulpur nung election magütsü mepir

Tamulpur, April 4 (Agencies): Baksa district kübok Tamulpur nung election maparen sota atatsü atema Congress-i takhangba agütsüogo.

Iba constituency nung candidate kati party ka tenüng nung nomination asü saka iba sülen tanga party ka nung ang aden.

Anogo ishika tejakdang candidate Ranja Khungur Basumatary-i Bodoland People's Front (BPF) toktsür BJP nung denogo anungji ozüngi

melaba ama mapa inyakang, ta Congress-i Assam chief electoral officer Nitin Khade dang shiogo.

Basumatary-i Tamulpur nungi BPF candidate ka ama tenüng agütsü saka April 1, 2021 nü pai BJP nung aden.

"Teloktep sasep nung lateta aliba ama Tamulpur Constituency ya Bodoland Peoples Front (BPF) nem lezmüksü aser iba atema Ranja Khungur Basumatary-i BPF candidate ama tenüng agütsü,

saka April 6, 2021 nü election agütsü lia, Basumatary-i election nung metokteper aser Bharatiya Janata Party (BJP) nung adener ta metetdaksüogo" ta Congress-i ashi.

"Basumatary anema ozüngi melaba ama mapa inyaktsü mepishir. Peoples Act, 1951 nung arrla 123 nung lateta aliba ama Tamulpur Constituency nung election mapa anentsü mepishir" ta Assam Pradesh Congress Committee president Ripun Bora-i shidi nung ashi.



Assam Rifles nung 22 Sector AR/IGAR(East)-i Easter Sunday nung IWCF Tamenglong indang Child Care Homes semdangogo. Meta talang pilar aliba Azuiram, Dikhuiram aser Gelnel tesemtem nunga Easter benjungtem mongogo.

MOLUNGNEN O



05.07.1945 - 26.03.2021

LATE Y. MERANGCHUCHANG (CHUNGTIAYIMSEN)

Onoki teti meima aliba tsürabur Asür Y. Merangchuchang, pa shiranga aliba mapang aser asüba anogo tashi nung kija, kibong, lokti tentet balala kwinakati mulungsoa, nübu, rongsen, shisatsü aser tamang sarasadem agi onok den yaritepogo, nenok ajak dang kanga pelaba lemsateper.

Nenok mapa yari onoki kecha meyipa magütsütetaka, Teyanglur Tsüngremi nenok taküm tali moajang ta ozü sarasadem.

- Temeim Klnungtsü, Chirnur, Semchir & Kinungertem

Piles Anepaluba - Kabiraj dang alakteta pelaba metetdaksür.

Piles, Fistullah, Gastric, Sinus aser Tonsil-Ajma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang Kabiraj H.

Umar Chesam contact no. 9362359056 / 7627998690

Address: Burma Camp Police point opp. tetuyuba nung anidaka surgery kecha magii (non-surgical) anepalur anogo ishika tsünga da taneptsü ngua liasü aser iba sülen tanü tashi kü temang nung timtem kecha mali.

Time: 9 AM - 5 PM -Yours sincerely - W.Sungjemtemsu, Add: 1-Mile



Manipur nung RIMS kaketshir asüba anema lungkak aiter

Imphal, April 4 (Agencies): Honibarnü Imphal East district kübok Khurai Lamlong Market nung nisung noklang aikati lungkak aitogo.

Arishi küm 22 tain MBBS kaketshir ka taitüsü keta sür lia anguba atema temeten meshia parnoki lungkak ait.

March 15, 2021 nü Regional Institute of Medical Science (RIMS) nung MBBS 5th semester student Sanaton Athokpam pa indang hostel takdang nung sür lia angu.

Sanaton Athokpam ji tepset liasü ta tai tonglokja par kibong, kinungertem aser Imphal East district kübok Khurai nung

alirtemi lungkak aityonga arur. Parnoki Manipur sorkar dang bushisüngdang asütsü akhanger.

Honibarnü Khurai aser temelet nung alir nisung aika adenshir lungkak ait.

Parnoki iba ken o ya CBI ama independent agency ka nem bushisüngdang südaktsütsü akhanger.

'Justice for Sanaton Athokpam' Convener, Moirangthem Loyalakpa-i ashiba agi, March 16 nü

Sanaton Athokpam mang nung post-mortem agi saka tang tashi iba indang osang yimjak nung memetdaksüi lir.

Totzü aser oset jenjang atuba anema AASU-i lungkak ait

Darrang, April 4 (Agencies): Darrang district kübok Mangaldai tesem nung totzü aser osettsüset jenjang tali atuba

dak sendakba nung sorkari kecha meinyaki yutsüba asoshi ola adoktsü nükjidong nung All Assam, Students' Union (AASU)-i lungkak ait.

Honibarnü, Mangaldai kübok Swahid Bhawan tesem nungi tenzüka AASU pur lungkak ait aser iba jila telungtet ajanga parnok tetsüng agi jaja.

Iba rally sentong nung AASU office ketdangpur aser züngsemtemi shilem agiogo aser osettsüset jenjang atuba atema sorkari mereprangi yutsüba anema parnoki yimyim ayima senzü.

Ano külen, AASU züngsemtemi Uzan Bazar,

Guwahati kübok Swahid Nyas tesem nung rally sentong ayongzüik.

AASU züngsemtemi placard aser gas cylinder tazüngla amer yimdong nung sezü; aser totzü aser osettsüset jenjang atuba asadangshia azüoktsü asoshi yimyim ayima sorkar dang takhangba agütsüogo

Kasa mapang, züngsem kari piyaz (onion) aser alo agi azük yanglua tekong nung inok. Ano külen, longkak aiter kari steel auso akodena aser pungdang temshia yimdong nung ayimtena sezü.

Maneni, Biswanath district kübok Biswanath Chariali nunga kasa maparen anema AASU züngsemtem lungkak aitogo



TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 05, 2021

MASHILEN NUNGI AKOKTSÜ MERANGBA

Mapa ajak nung takok angutsü baji nisung ajak atema kanga tongtibang lir, kechiyong takok nungji konang nungsang, tagi tarutsü aser nungdak inyaktetsüsa tashi tulu keta lir. Ibayongji, asenok ajaki mapa ajak nung takok angutsü arishir. Aji oda, peii metetba aser meranga inyakba ajanga takok anguba agi pei taküm aser kibong dang masü saka nübortem nem temoatsü aser anisüngzük tapu balala bener arutsür. Ajisüaka, kodang asenoki memetet aser asen dak malang ser mashilen nungi asüyonga takok angutsü merangdir, iba takok jagibo temoatsü masü saka ajak atema timtemang bener arutsütsü. Aji oda, tatishitsü agi kecha memetet ser master degree bener aru nung, aji kong agitsü? Mesüra kecha memetet ser doctorate angu nung kechi sütsü? Iba jagi peisasa pei ashioktsüba dang masü saka tangar dena ashioktsütsüsa akümtsü. Iba ama taila takok jagi asen lima nung tesem aika nung maparen aika nung meteta aser memeteti asen lima aser nübortem kanga akoksadagi. Ano, iba dang nungi tamajungba aser takoksa tuluba angutsüsa mashilen nungi akoktsü merangba mapa kaji, election nung süng long dang masü saka injang bomb dena amshia takok angutsü merangba mapa ya asütsü. Aji oda, ano tangbo linük nung election agiba mapang EVM dena tim mesüi amshia takok angutsü merangba angur. Linük nung taoba election mapang EVM tim mesüi amshia takok anguba otsü aika jembio saka tim mesüi amshia aliba jakdaka apuba kuli malinungji, item ajakji temulung melemtetba o dang kümer yuogo. Iba jagi, joko karibo election nung Electronic Voting Machine masü saka akhidang ama ballot paper dang amshitsüla ta akanger. Iba ama taoba election result dak temulung melema bilema aliba mapang, tang Assam election nung BJP candidate ka gari nung EVM bona lia apuba jagi taoba election result dak temulung melema jembiba to tiyazübo masüa ta kuli ka angur. EVM ya dokan nung alitsü anguba oset ka masü mesüra lokti mashi ka nungdak nung amshitsü yangluba oseta masü saka election mapang Election Commission ketdangsuba nung election agidak amshitsü asoshi yangluba oset ka lir. Ajisüaka, election anogo nung candidate-temi EVM bener jaja nungbo, iba election-jibo magiang tajungba asütsü. Iba jagi linük nung temzüng ozüng maka akümba tensa tia indang noksa ka sayur. Aji oda, temzüngi kechi ashir ta masü saka telok tulubai kechi ashir aser tang yimsü tesüdak purtemi kechi ashir ta asüba sülen anidakra, iba limaji rongrongshishi agi tipmatem akümtsü. Atangji, yimsüsürtemji ozüng yanglurtem saka kodang alima ajungtsü aser nübortem ajangzüksü bilema masü saka tanü ajunga asaa temzüng ozüng melenshidir aser kürakdir, asüng iba jagi asenok tuluka nung akoksatsü. Ibayongji, yimten nung telemtetba agidang, asen par ta masü saka ochi mulung agi yimkong ajungtsü bilema latetter. Tanü asenoki sen agi vote alia election nung akokba, nisungtem tsübudakja takok arishiba aser taila EVM tashi amshia kechisüdirsüaka takok angutsü merangba jagi, ashiko, takokbo angutsüa akok, saka mashilen nungi anguba takok aser yimten tashi jagi alima ajungtsü sabo meinyaktetsü. Tanü Nagaland kangshibajia, takokbo angu saka mashilen nungi anguba takok asübayong azükaru masür. Koba lima aser shirnok südir sang, alima renloka aobaji mashilen nungi takok anguba ajanga masü saka tamakok anguyonga ochishia alitsü merangba aser tetoktepertemi tim len nungi takok angutsü merangba ajanga renloker. Koba maparen nung südir sang, mashilen nungi takok anguba dang nungibo tim len nung lia tamakok angu tajungba. Atangji, maparen ajak nung indangindanga alitsü aser inyaktsubaji kang tasak saka tasakji kokteta makok tashi aseni anguba takokji takok masütsü. Aji oda, asen lima ajungtsü asoshi asenokbo tim len nungiang takok angutsü merangtepdi.

OLEMSABANG

Clean Election: Yamai inyak nung Jungdisü?

~ Dr. Bendang Longkümer, Artang (Osang zülur)

(Yashi adok nungi...)

Yamai inyak nung koda?

1. ABAM aser tanga denominationkwa lir, aser AKM, Ao Senden, Watsütem-i Election atongtsü küm asemji ka lia külemi senteper senden tajunga ka Clean Election nükjidong yur amentsü aser iba telemtetbaji Ao area ajak nung amshiatsü nükla nung agi ajungtsü.
2. Iba sülenji küm ana lia Lai tarok Bushiba aser ibaji Clean Election tsütsü ABAM-i mesüra Ao laishir telongjemi kanga nendaka tongtibang süa iba Lai bushiba (bible study) tesayuba agütsü nung kanga ajungtsü.
3. Küm ana mesüra ka lia Arogo ajak nung Asüngsashi sentong (Revival) ka agi nung ajungtsü.
4. Election atongtsü küm ka lia Ao lima Arogo nung election dak sendakba sarasadem agi tenzüksü aser kokra iba sarasadem ya ita ana/asem nung kenbosa agitsü ta lemteta ayu nung ajungtsü?
5. Election atongtsü küm ka lia arogo ajak nung ozü arogobo mesüra ozü yimerbo Clean Election agitsü ta Tsüngrem den tezüngzüktepba/tenangzükba agia arogo aser yimden lungjemer iba mapaji inyak nung kanga ajungtsü ta asüba onük aika lemsatep.

Shisalen tesayur tenati jembir külen onük dak sendakba nung osemlok aser olemtep mapang jembidang jembia aruba nungi Arogo züngsem aser voters list tetsüngda tuluka lir anungji arogoi yimden aser administration den angatetepba reprangshitsüba mapaji kanga dang shitak aser aji kanga dang tongtibang tebushitsü tera ta angateta temelenshi bener arutsü merangtsüla ta maneni o semloktepa jembitep kechiyong Arogo züngsem küm 14-15 years, saka Election voter minimum kumbo 18 years) anungji Arogo züngsem dang nungi voters teimba. Iba tashidak ya ulura lir. Ya reprangshitsü nungdak shibai inyaktü? Koda inyaktü? Shibai tenzüksü?

Clean election tebilemsü ya koba sabang nung jembitsü aser kodaser nübortem nem angatetdaksütsü aji kanga tongtibang aser nendaka itemji angatetdaksütsü asa sentong balala agia, leman balala, sabang balala nungi angatetdaksütsü baji kanga nungdak. Kechiyong nübortemi angatetsü aser metet nung dang temelenshi bener arutsü. Iba maparen ya arogo kisüngi dang inyak nungbo Clean Electionji tamakok angutsü saka lungjemer inyaktü leman bushitsüla. Lanurtem aser yimden teyari, lokti balala lungjemer inyak nung dang Clean Election tongpangji takokba nung bener otetsü. Clean Election takok anguba indang jembidang Mizorami inyakba nungi angazüksüla, kechiyong arogo aser administration na tesendaktep tajung kar parnok takok inyaka aruba angur. Arogoi ashibaji administrationi angar aser parnok tsüngda transparency maintain süteter aser arogoi ochishia rarar, iba yongji Mizoram nung Clean Election takok ngua inyaker. (Mizoram nung Clean election koda inyaka aor, YSS nung tenishir kar nem jembidaksü nungbo aika temoatsü asütsü). Arogo aser ABAM-i iba amaji tasü ita inyaktüla aser iba tesendaktepji (relationship) maintain asütsü kanga tongtipang. Arogoi tsübur aser tasü maiter aser iba maparen ajanga mangatetep adoka jashitepsü bilemer. Iba yongji asenoki rakpoka Clean Election tongpangji merarateter aser pei pei litsü (boundary) ka nung dang rarar, iba yongji rakpoka moteter aser inyakyim nung tasü maiter. Kodang transparencyji lidir temelenshi arutsü. Arogoi Ochi jembiba mongjen asütsüla. Tsüngrem tenüng nung tasü ita ochi o jembitettsüla. Aji Arogo teinyaktü. Isaia ainkar-i ashi, "Ochi nungi talangka pilaa aliba nenok temulungjang temerang alirtem." Arogotem tasü aittsüla aser ochi asoshi ayimtentsüla.

Clean Election arogotem balala nung iba yim-yim sangoktsüba den amangbapuri anir Election koda merükteta shilem agitsü item indang tesayuba agütsüba den külemi arogo nung Clean Election atema Lai bushiba (Bible Study) tenzüksüla. Lai teratet aser Lai o-i kechi tuyur iba teratet tangatetbaji nübortem ajak nem angatetdaksütsüla. Clean Election takok aika lir saka asenoki Clean Election agia aruba ya asenoki political asü nungji Laishiba ranglok nungi masü saka political ranglok nungi dang agia lir aser ibajagi takok aika monguteter aser tamangertem nemji Laishiba ranglok nungi tangatetba magütsüteter. Anungji jilia mapang lia tang ya mapang tajung anungji tesem ajaklen iba osang tajung ya bener oa Laishiba ranglok (Biblical Perspective) nungi laishiba-a yimden nung shilem agitsüba koma ashir item tesayubatem agütsütsüla. Arogo nung Clean Election atema Bible Study tenzüksü asoshi Laishiba nungi Chubattem kaket aser Putipuyang kaket ana nung yagi "Clean Election with special reference to book of Kings and Chronicles" ta ser tenzükrabangla iba jagi nübortem nem tangatetba tulu agütsütsü.

Election nung tongti shilem agirtemji küm 35-55 shi puri agir. Parnok aika jila nung alirtem, karbo mapa tajung nung lir, karbo takar, saka election mapang item rogo yagi yimtsüngtem nung tebenja aika bener arutsür. Tata menden nung toktepera rongsen kanga lalushipokdaksür. Ano parnokji aika sentepsenchi marur aser tajungshi o ashitsü sabang tajung munguteter. Anungji Clean Election nung takok angunera kijung lanurtem nem tangatetba tajung agütsür parnok yakpang südaksür anidaksütsü arogo aser NGOs balalai tapet sendong jilia yanglutsüla.

Alima ajunga nung Election merükteta magitetba ajanga temenen mapatem aika jungkai adoka nübortem timtem ajuruba aser Khristan taküm ka nung tetendangba aruba aika asenoki angur aser ajangshir. Naga nung jaklaliro kimong raksatsüba tulutibaji Election ya lir. Iba ama alima mapa nung Tsüngremi mulungba kechi iba indang tesayuba aser tangatetba agütsütsü khuret angateta Clean election tongpang nung ajaki shilem tajung agia sarasadema inyaktüla. Clean Election mapa ya asenok tamanger rongnungi adoktsüla. Clean Election Campaign ya maoa kanga tulu aser ya khenyongi memelenshitetsü saka tang nungi ajak nem tangatetba shitak, ochi nung alitsü, merüka alitsü angatetdaksüra asenoki merangra atangji asenok 'takokertem dang nungi taoba' asütsü. Tsüngrem tsüngdang takoktsü lir. Clean Election campaign ya nisunger agenda ka dang masü saka Tsüngremi asen nem agütsüba wadang ka aser tanü nübortem ajaki aginüba olaji ibai lir. Nehemia-i par lima yanglushitsü ayimoktsüdang Israel nung ajak "mapa tajung asoshi parnok tashi ita aküm" (Nehemia 2:18), yamaji asenokia ajak Tulusang Tsüngrem dak imla-a asen lima yanglutsü lungjemshidi ta Yanglushidi Sensaksem Sabang ajanga ayimoktsür. Iba sensaksem ya mapa kümteta bener aotsü ta amanga aser iba sabang ajanga temelenshi kabo bener arutsü ta amanger. Taruba ita nung maneni YSS sensaksemba osang lemsatepba nung temoatsü aser tangazükba tulu angutsü yongyaseta sarasadema atadi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Wara anema tenokdangba liaka Khristantemi Easter mongogo



April 04, 2021 nü Easter anogo nung Yirusalem yimti nung aliba Holy Sepulchre Tenla kidang Khristan putirtemi sarasademba noksa nung angur.

April 04, 2021: Yaküm coronavirus wara prokba nokdangtsü atema linük aika shibangba ajanga Khristantemi tekülem kidang Easter sentong magiteti liasü, saka tangbo iba wara terabo süngjemba agi alima tesem balala nung aikati Tenla kidang Easter tekülem sentong agiogo.

South Korea nung Protestant Arogotem nungi tenzüka Vatican nung St. Peter's Basilica tashi nung Khristantemi coronavirus wara anema telatetbatem shidak beshia Easter tekülem sentong nung denogo.

Yaküm February ita nung Italy kübok Lombardy region nung aliba hospital ka nung iba tashidak kanga proka liasü, aser tanü (April 4) Easter anogo nung iba hospital nung coronavirus vaccine agitsü atema arur ajak nem yimjung temaitsü posü mesüka yangluba Easter cake lema agütsü.

Israel nung coronavirus wara anema tayimtsü mesenzüba den külemi tenokdangba balala aliba agi temeshi hopta nung (Palm Sunday, Good Friday & Easter) bendang linük balala nungi Khristantemi Yirusalem mesemangteti liasü.

St. Peter's Basilica nunga

Pope Francis-i Yisu noksa anasa teronem menemtsü tzü ainba sülen pai, "Easter tepela yagi alima tesem ajak tongdakjang," ta shia liasü.

Easter anogo nung teti agia iba Tenla kidang nisung meyrjang aika adener, ajisüaka takümbo iba Tenla kidang nisung 200 dang mela-a liasü. Iba dak alia Easter anogo nung St Peter's Square kima nisung lakh 1 dak tema adenshir, ajisüaka yaküm ama taküm-a Italy aser Vatican nung lokti adenshitsu memelaba agi St Peter's Square kanga azümgmeyaka liasü.

Tawa coronavirus tashidak kanga prokba sülen Italy sorkari nüburtem dang shishilembatsü mesüra exercise agitsü atema kimai ayazükba dak alaka ki telung nung ang amongtsü tuyua liasü.

Yirusalem nunga Holy Sepulchre Tenla kidang Easter sentong agiogo.

Israel nung coronavirus vaccination mapatong kanga takok ngua agidar, aser iba nungji ajemdaker linük nung restaurants, hotels aser temeshi tesemtembo lapoktsü melaogo.

South Korea nung Protestant Arogo tulutiba-

Yoido Full Gospel Church nung Easter tekülem sentong nung adentsü atema nisung 2,000 dang (Tenla ki capacity shilem 17 dang) mela-a liasü, ajisüaka tekülem sentong nung adenertemi ken atenba aser sarasadem agiba densema sentong ajakji online aser Christian TV channels ajanga yok.

South Korea nung Catholic Arogo tulutiba- Myeongdong Catholic Cathedral nunga tekülem sentong nung nisung shilem 20 dang adentsü mela, saka tekülem sentong agibaji YouTube ajanga yok.

Italy kübok Puglia region nung governor aser mayor temi Khristantem dang kidang nungi mayazüktsü saka TV ajanga dang tekülem sentong nung adentsü mepishia liasü.

Italy nungbo Khristantemi Honibar aonung Easter Vigil Mass nung kanga longsoa adener, ajisüaka linük tesem ajaklen aonung 10:00 ako nungi anepdang 5:00 ako tashi curfew ozüng aliba agi ghonda ana jelia iba sentong agi.

France nunga coronavirus wara kanga prokdar, ibayongji takümbo Arogo aikati Honibar ayaterm nung masü saka Amongnü züngia Easter sentong agi.

USCIRF-i Pakistan dang Tsüngrem atalaba ozüng agientsü mepishi

April 04, 2021: U.S Commission on International Religious Freedom (USCIRF) Commissioner, Johnnie Moore-i Pakistan linük dang linük nung Tsüngrem atalaba/ mezüngmeshiba ozüngtem agientsü mepishiogo, ta International Christian Concern (ICC) osang ajanga metetdaksü.

Tawa Pakistan yimtiba, Islamabad nung International Women's Day anogomong nung yimdong süa jajatsü atema lokti adenshiba mapang nung nisung kari iba sentong ayongzükertem anema First Incident Report benoka liasü; iba sentong nung shilem agirtemi tashishitsu noksa sayar aser tamangba

yimsü balala anema jembir, ta tai tonglokja liasü.

Iba sülen court kati iba sentong ayongzükertem anema bushisüngdangtsü tuyua liasü.

Iba tatalokba dak sendakba nung USCIRF Commissioner, Moore-i, iba ya Pakistan nungertem atema maaksü lir, ta ashi.

Muslim nütsüng timba aliba linük- Pakistan linük nung Tsüngrem mezüngmeshiba ozüngtem nung ajemdaker Khristan aser Hindu nungertem kanga reshikangshir.

Item ozüng nung ajemdaker Khristantem nem tiyazü nung tai tongloktsüba sülen tepuokdak ayur mesüra tasüba

temerenshi obendang agütsür.

Aiben mangyangtsü atema iba ozüng kübok minorities nem tai tongloktsür, ibayongji parnok tesem melenshia alitsüsa akümer.

Commissioner Moore-i jembiba o dak sendakba nung Director of Advocacy ICC, Matias Perttula-i, "Pakistan nung Tsüngrem mezüngmeshiba ozüngtem tim mesüi amshiba ajanga Khristantemi maneni timtem ajurur. Pakistan nung Tsüngrem mezüngmeshiba ozüngtem ya tai maket nisungtem raksatsütsü atema hadirtem lir. USCIRF-i item ozüng tangsa agientsü akhangbaji tim dang," ta ashi.

ANOGO ABEN TSÜNGREM DEN

Ne tesangwa kari nüngdaker

"Yamaji nisungtemi nenok mapa tajung ngua, Kotak nung aliba nenok Tebu sentsüwangshidaktsütsü asoshi parnok madang nenok tesangwaji jungkai adokdakjang." (Mat. 5:16)

Khenü anogo tetsür kati tamanger tajung ka ajurua kanga pela-a jembi. Lai yamai ashi, "nai nibo memetetsü, saka nibo na meteta lir. Kechiyong nai anogoshia osang kakat nung Tsüngrem O nungi tajungshi O züluba ni azünger. Khenü ni kü taküm tembangtsü bilema alidang nai züluba osang ajanga kü taküm kümzük. Iba osang ni mezüngshi asübo ni tanü yangi taküm melila" ta lai lemsatepba liasü. Yisu-i ashi, 'nenok alima tesangwa' (Mat. 5:14). Kodang asen dak Khrista tesangwa ya-a lidir tangar tammang nung koda masür nemzürtem asoshi teyari tulu akümer. Kodang asen dak Tsüngrem tashi angaba lidir asen dak tesangwaji tsükloker. Kibubai asenok mapa tajung teti tsükloka alitsü ashir, kechiaser kodangsa asenok mapa tajung inyakdir aji tesangwa tsüklokba temaitsü lir.

Tsüngremi ne nem kechi sempet, tejangraba, aser tajungshiba agütsür iba jagi tangar kar asoshi tajunginyaktsü anogo tenzükang. Tezülurtemi zülüang, akartemi tangar den lensatepang, kenteneri Tsüngrem temeim indang tenang... Yamaji kar taküm asoshi naji tajungshiba südakjang. Tanü nai shiba sangwadaktsütsü?

Sarasadem

Kibuba Yisu ni kü lenmang nung ne temeim tesangwa teti tsükokdi. Kar tammang nung lira parnok dangi ni aniang. Amen

Mali nung puer aoba missionary Beatrice Stoekli tasü mang nguogo



Swiss tsür missionary, (asür) Beatrice Stoekli noksa nung angur.

April 04, 2021: Islamic kiralongrartemi Khristan missionary, Beatrice Stoekli puer aoba sülen la tepset, saka ita aika lir sülen ang la tasü mang nguogo; DNA test agiba ajanga la tasü mangji jangjaogo, ta International Christian Concern osang ajanga metetdaksü.

Switzerland nung Foreign Ministry-i tama iba osang sangdonga liasü.

Switzerland foreign minister, Ignazio Cassis-i sangdong ka ajanga, "Tamalen tangari puer aoba tetsürla asüba kuli onoki jangjaba osang tejashi nung sangdonger. Ajisüaka onoki tetsürla tasü mangji lar kinüngerterem ket nung agütsütetba atema pelar, iba denji külemi lar kinüngerterem dang ni mangyim jashi lemsateper," ta metetdaksü.

Missionary, Beatrice Stoekli-i 2000 küm nungi

tenzüka Mali kübok Timbuktu yimti nungi lai Khrista osangtajung prokba den külemi tetsürtem aser tanurtem atema inyaka aru.

2016 küm al-Qaeda den sendaktepa aliba kiralongrar telok- ama'at Nusrat Al-Islam wa'l-Muslimin (JNIM)-i la puer ao.

2020 küm October ita nung France tsürr charity worker, Sophie Petronin-i Beatrice süogo, ta metetdakja liasü saka la tasü mangbo tang ang angur.

2016 küm kiralongrar teloki Sophie-a pua liasü saka tesülen chiokadok.

Sophie Petronin-i ashiba agi, Beatrice-i la puer aoertemi mapang shia la tesem melenshia ayuba agi la (Beatrice) kanga jashia liasü, aser lai parnok anema maneni raraa aruogo.

Kiralongrartem jagi la kimai anizükba sülen khaset.

OLONG PAITEP # 5772

1			2			3			4	
			5		6		7			
8										
			9							
	10									
									11	12
			13				14			
15						16				

TIPIEN		LANGTSÜNGLEN	
1. Anenzükdak ki	- (5)	1. Reprangdaktsü	- (4)
3. Asür mangyimba	- (5)	2. ___ ur	- (3)
5. Temulung nung shisadang	- (5)	4. Kiojen yangludak	- (6)
8. T ___ lu	- (3)	6. _____ ait	- (7)
10. Takdang temalen	- (9)	7. Nagaland nung ayong ka	- (5)
11. Tesa ___ a	- (3)	9. Küm kasa purtem	- (5)
13. Ajungbena temulungjang tongtonglatsü atu	- (5)	10. Tetsüng tajemtdak	- (6)
15. Tejen lai nung tesayur	- (5)	12. ___ adenshi	- (4)
16. Tsüngsak-mopung	- (5)	14. Tsünüsenbongtsü adokdak	- (3)

OLONG PAITEP # 5771 TELANGZÜBA

TIPIEN :		LANGTSÜNGLEN :	
2. Anükalem, 4. Mesak, 5. Apet,		1. Kündang, 2. Ayak, 3. Leptep,	
9. Meimtep, 11. Posü, 12. Patak,		6. Sati, 7. Yiar, 8. Sangküm, 9. Metsük,	
13. Tekettsü.		10. Mazü.	



ALOKBA-ER KIDANGI COUNSELLOR KA SARASADEMI ARU

Counsellor: Hai adianu...Ni kipoksem sarasadem arur ako...Ner junga dang lir südi ...???

Alokba : Hau-niii...Junga dang lir-ko...arung nii...koa nenok ya kechi nungdem nung kipoksem sarasadema jajar-ba ya ...???

Counsellor: Ayyaa... !!! Ner arogo nung Revival tulu-ka ya ayongzüker tanü agi anogo asem tashi kipoksem sarasadem jajar ado ya....!!! Koa ni ner atema sarasademtsü-di... tamasa kinungtsüi sarasadem nung abentsüla onuk kar lira shiangjo...???

Alokba : Sssh...Sssh...Sssh ...Tantsü asen kibong telung otsü kecha teshima nooo...


Kinungtsü: Ayyee...Oda tashitsübo aika dang lir-ko...Saka oda kecha meshili-jai.... Ano ozü kibong otsüji nenok aolen kibong ajunga nung jembia jaja nungbo dikdar-a. Tsüngrem lar asüyongjia karbo tebang temeli telili lirji ...oda kecha meshili-ja.

Lilir: L. Kika Pongener.

AO OSHI ANGAZÜKDAK:
TANÜ ANGAZÜKTSÜBA OJANG

Au
(n) arem nung aliba süngküm (wild bamboo)
Ozü alu achidang au kanga liasü.

Hau
(exclam) Shitaka ta agizükba (yes)
· Leniri ashiba ajak onoki hau ta agizük.




Happy Birthday

TENÜNG - MONGLONG

Talidak - Kashiram
Küm - 12
School - GPS Kashiram
Class - 5
Tasoba Anogo - April 5

Monglong na küm ter ana junga anir aruba asoshi Tsüngrem nem tenungsang agütsür,ano arishi anogo temjena moajangma ta sarasademtsür.

- Temeim Apa, Mummy, Molungti, Lydia, Agusa, Oko Jilo aser Otsü.



TANÜBO NAI LANGZÜANG

Q. Global Wind Energy Council (GWEC) ya _____ küm tenzük.

A. 2005 B.2010
C.2012 D.2019

(Taruba adok nung onoki langzüksü)

YASHI ADOK TELANGZÜBA: 1975

SUDOKU # 5815					TELANGZUBA # 5814				
3			7 6			9	1 2 9	6 8 5	3 4 7
8	7 1				2 3	6 8 3	2 7 4	1 9 5	
	6		8	3	1 7	4 5 7	3 1 9	8 6 2	
	8				3		3 6 1	4 5 7	2 8 9
4		7 1 3					2 9 8	1 3 6	7 5 4
1			5 9		4		5 7 4	8 9 2	6 1 3
	1		6 4		5 3		7 4 2	9 6 1	5 3 8
9		4					8 1 5	7 4 3	9 2 6
2		6					9 3 6	5 2 8	4 7 1

OJANG LUTEP # 5359

URTULI :

ARTIL :

NGDA :

OCTAHI :

PAMA :

YURSAA :

RITILA :

EMJITI :

ANGKODA :

ARMAM :

OJANG LUTEP TELANGZÜBA # 5358

KIDANG KAZÜTSÜ DAK ALAKA TANGA TACHITSÜ MESÜRA TAGITSÜ KECHA MAKÄ

TAN HOPTA ATEMA - KOMA SÜLA ?

Q. Myanmar nunger nübortem par lima nung sepaitem tsübuba agi süngjema melitet, parnok meyirijang anasemka Nagaland nung khen atema tejenokdak bushia arua nunga koma süla ?

Olong 20 shi nung April 09, 2021 tashi nung iba telangzuba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsüsü.



Mitkartemi sorkar atsüngdokba anema Yangon, Myanmar nung longkak aitba mapang nüburtemi teka agi yangluba air rifles amer nokdaka aliba noksa nung angur. Mitkartemi longkak aiter dak tashiyim amshiba aser apuba agi anogoshi Myanmar linük nung longkak aitba manener, shirnoki mitkar dang yimsüsüba menden yujang ta takhangba agütsür.

Indonesia tzümetzüng aser anentsüh lendong nung nisung 44 asü

Jakarta, Rongchii/April 4 (Agencies): Deobarn anepdang Indonesia anüdok tip nung aliba province ka nung ajungben tzümetzüng aruba aser anentsüh aluba lendong nung nisung 44 süogo, ta ketdangsürtemi metetdaksüba den lendong nung asür timba akümtsü akok, ta ashi.

East Flores regency nung nisung 44 süogo aser nisung teku yiruru lir. Nisung aika lishi nung rema lir, ta National Disaster Mitigation Agency otongdar Raditya Jati-i AFP dang ashi.

Easter anogo mungtsü atema neburtem mesak tsüngda ghonda ishika lia Catholic tem timba aliba Flores asetkong nung tzünglu aruba ajanga tzümetzüng adokdaksü. Lishi

agi kitem mobang aser asetkong anüdoklen lenmang aser apudem aika raksatsüogo, ta National Disaster Mitigation Agency otongdar Raditya Jati-i ashi. Teküzükertem East Flores regency nung kinük nung aliba aser lendong agi tamajungtiba kongshir aliba tesemtem tonga moteti lir. "Adonara asetkong nungi tzüyim adena aotsüba dak alaker kecha lenmang mali, saka tzünglu aruba aser tzüsem tesashi adokba ajanga moteti lir, ta Jati-i Deobarnü AFP dang ashi. Hopta tepeyong tsüngsang kanga mejungi süitsü imlar, ta paisa ashi.

Kasa mapang nung Deobarnüsa Bima yimti aser kidanger province Nusa

Tenggara nung tzümetzüng lendong nung nisung ana süogo, ta disaster agency-i metetdaksü. Ghonda teku tashi tzünglu medangi aruba sülen sub districts pezü nung tzünokdangtem moshi ayimba ajanga Bima nung ki 10,000 shi metsnngbangogo, ta Jati-i ashi.

Tzünglurowa anentsüh aluba aser tzümetzüng aruba ya Indonesia nung tang tasen masü. January itaa Java anüolen Sumedang jila tzümetzüng agi raksatsü aser iba lendong nung nisung 40 asü. Taoba küm September ita Borneo nung anentsüh aluba lendong nung nisung 11 asü aser iba masüdag ita ishika jelia Sulawesi nunga anentsüh aliba lendong nung nisung aika süogo.

Covid-19: Japan-i tenokdangba tali benoktsü

Tokyo, Rongchii/April 4 (Agencies): Japan Ato Kilonser Yoshihide Suga-i Deobarnü, coronavirus tashidak asendenshir prokshia aoba nokdangtsü nüngdakba reprangteta pai jongdak agiba jenjangtem tali benoktsü, ta ashi.

Fuji TV sentong ka nung Suga dang, Osaka densema Hombarnü nungi tenokdangba agütsütsü renemer aliba nung Tokyo dena bendenloktsü asü ta asüngdangba mapang, lenmang ajak asatepdar, ta pai langzü.

"Kong benoktsü aji tongtibang masü saka nüngdak dang süra onoki matidaki tenokdangba agütsütsü," ta pai ashi.

July ita summer Olympics metenzük tsüngda Covid-19 tashidak asendenshir prokshia aoba nokdangtsü atema Japan kanga meranga inyakdar. Tang tashi nung nüburtem vaccine agütsüba sentong tulubo ayongzüka agia mali.

Deobarnü Tokyo nung nisung 355 dak tashidak potetba jangjaogo, ajisüaka January ita anogo ka nung nisung 2,500 tema dak tashidak potetba dang nungibo iba ya kanga agi tajemba lir.

Osaka temeket nung tawa tashidak potetertem dak tashidak tapu tasen ka keta aliba potetba sülen Health dak sendakba nung mongintem tebilemtsü akar. Britain nung poktetba asütsü ta bilemba tashidak tapu tasenba ya kanga kara mentepyonga aoer.

Honibarnü nisung 666 dak tashidak potetba sülen Deobarnü Osaka prefecture nung nisung 594 dak coronavirus tashidak potetogo.

Tashidak tapu tasen balala ajanga alima ajunga taoba küm nungi kongshir lir kong E484 mutation densema lir aser iba tapu tasenba ya Tokyo nung nisung aika dak potetogo, ta Ketdangsürtemi ashi.

Taoba ita Tokyo hospital

nung tashidak tendanger shilem 70 shi dak E484K mutation putetogo, koba vaccine agiba ajanga kangabo teküzmükba magütsür, ta public broadcaster NHK-i ashi.



Jerusalem yimti nung aliba Church of the Holy Sepulchre nung Latin Patriarch-i anir putirtemi Easter Sunday mass agiba mapang tangokba noksa ka yangi angur. Iba tesem nungya Yisu Khrista arem, ta amanger.

Jordan indang Prince Hamzah kidang pua lir

London, Rongchii/April 04 (Agencies): Taoba mapang Jordan indang crown prince alisangi ashiba agi, yimsüsüba aitsüba anema nokdakba nung shilem ka ama pa kidang pua lir (house arrest).

Pa indang okatsüri BBC nem agütsüba video ka nung King Abdullah indang adianu Prince Hamzah bin Hussein-i linük lenirtemi ochimashi mapa inyaker, mapa tajung takok ngua meinyakteter aser tashiyim amshir, ta aitsü.

Mitkartemibo Prince Hamzah ya kidang pua mali, ta ashir. Saka Jordan indang 'security aser stability' nung kongshitsüsa mapa inyakba anenang ta totuyuba agütsüogo, ta ashi.

Egypt aser Saudi Arabia densema region nung tashi tait linüktem King Abdullah bukuma jembio.

Jordan nung ali rongsen kar lir aser COVID-19 tashidak

wara agi rongsenketsüng nung kanga mejungi kongshi. Ano kidanger linük, Syria nung civil war adokba mechi refugee aika iba linük nung anioka lir.

Honibarnü record asüba video nung pai ashiba agi, pa adenba senden ka nung sorkar mesüra chuba aija ola adokba mechi pa ki alema aotsü mesüra dangar den osang ola agiteptsü memelar ta chief of the general staff ajanga ashi.

Saka pai aitsüba o jembiba taibo tonglokja mali, ta pai ashi.

"Ajisüaka asen sorkar inyakyim nung tesüba küm 15 nungi 20 tsüngta teraksa, ochimashi aser mapa tajung takok ngua meinyaktetba ni tai masü... Aser sorkar dak nüburi tamang makatetba atema ni tai masü," ta pai ashi.

"Timtem majurui pei tangatetba lemsateptsü makokba jenjang ka tongogo." (Maneni tapak 9 nung...)

Tigray region nungi Eritrea sepaitem ainshi tenzükogo

Nairobi, Rongchii/April 04 (Agencies): Ethiopia north tsütsü Tigray region nungi Eritrean sepaitem anizüker ao tenzükogo, ta Ethiopian Foreign Ministry ajanga ashi.

Ethiopia nunger ajungai agizüktetsüsa yimtenren tsütsü maparen inyakba sülen United States, Germany, France aser danga G7 linüktemi Eritrean sepaitem tekeratiba nungi anizüker aotsü atema Hokulbarnü ajungshia liasü.

Honibar aonung Ethiopia indang Foreign Ministry ajanga osang ka sangdongba nung, region nung tang nüngdakba inyaksü asoshi tongtipang mera agiba atema G7 foreign minister temi sangdongba nung shia mali.

"TPLF temi rara mesüba mapang arrtsü alema aruba Eritrean sepaitem meyipa ao tenzükogo aser Ethiopian National Defense Force temi linük arrtsülen anüker," ta sangdong ajanga ashi.

November ita sorkar tenteta

aliba telok den sendaktepa aliba Tigray People's Liberation Front (TPLF) temi iba region nung mitkartem amenoka aliba tesemtem amakba ajanga Tigray nung rara tenzük. November ita tatemlen federal sepaitemi linük yimtiba, Mekelle nungi TPLF atsüngdok aser Ethiopian sorkari takok nguogo ta sangdonga liasü.

Iba rara nung nisung meyririjang aika asü, aika pei kidang nungi ainshitsüsa akum aser region nung chiyongtsü, tzi aser mozü agi anünga akum. Rara timta ajema kumogo, ta sorkari ashir, sama mapang shia tesem kar nung khatetba ataloker.

Iba region nung humanitarian organisation tem oa teyari balala agütsütsü asoshi temelaba agütsüogo, aser meimchir temeden nung aibelenba atema dangartem dena bushisüngdang tenzüktsü, ta Foreign Ministry ajanga ashi.

Shashikala alima nungi pilaogo



Mumbai, Rongchii/April 04, 2021 (Agencies): Deobarnü, Bollywood actress Shashikala Om Prakash Saigal süogo. La arishi küm 88 liasü.

Asür Shashikala-i lar tsürabur yaritsü asoshi, lanuwa mapang nungi lai acting tsütsü shilem agitsü tenzük. La asüba dak sendakba nung kinungertemi osang tejangja magütsü, ta website sangdong ka ajanga metetdaksü.

Nüngtugu Bollywood screenwriter Kiran Kotrial, shibai television show talisa Big Boss aser Khatron Ke Khiladi atema script zülutsü, pai Facebook sabang ajanga Shashikala asüba osang

lemsatepa liasü.

Kiran-i, asür Shashikala indang noksa kar den "Shashikala, tesünep nung anisüngzükangma," ta olen lemsatep.

1932 küm August 04 nü Solapur, Maharashtra nung Shashikala aso. La ya nüngtugu television aser Bollywood actor ka liasü. Bollywood 100 dak tema nung supporting actress ama lai shilem agiogo.

Film talisa, Mujhse Shaadi Karogi (2004), Teen Batti Char Raasta (1953) 'Daku', 'Jugnu' aser 'Aarti', nung Shashikala-i tongti shilem agiogo. Film dak alaka, laisa TV shows talisa Sonpari aser Jeena Isi ka Naam

hai nung shilem agiba ajaki jangjaa lir.

1950s tatemlen film industry nung takok ngua inyaker sülen, actress Shashikala-i Bollywood movies Aarti aser Gumrah film atema best supporting actress category nung Filmfare award takok angu.

Indian Cinema tsütsü shilem tajung agiba atema, 2007 küm lai nem Padma Shri award agüja liasü, koba tematiba civilian award rongnung pezübuba lir.

Tesüiba küm ishika tejangdang, nüngtugu film talisa Pardesi Babu, Baadshah, Kabhi Khushi Kabhie Gham, Mujhse Shaadi Karogi aser Chori Chori nung Shashikala-i shilem agiogo.

April 8 nü HMD Global-i sentong ka ayongtsü

New Delhi, Rongchii/April 04, 2021 (Agencies): HMD Global ajanga Brestobarnü (08.04.2021) sentong ka ayonga agitsü terenemba lir. Iba Global Launch sentong nung Nokia-i phone tasentem sayatsü imlar.

Sentong nung product balala sayatsü asoshi company ajanga osang tejangja magütsü, saka taoba mapang osangtem ajanga angazükba agi, Nokia G10, Nokia G20, Nokia X10 aser Nokia X20 tem sayatsü a s a d a n g d a r .

Iba global event ya aonung 7.30 ako nungi tenzüksü aser Nokia mobile fans temi Nokia YouTube aser tanga official channel tem ajanga live reprangtetsü. Taoba mapang leak osang ajanga angazükba agi, Nokia G10 nung model

number TA-1334 keter angutsü akok aser company ajanga gaming device sayatsü. Iba phone nung Nokia 5.4 ama feature kasa angutsü, koba India nung 4GB aser 6GB RAM variant ana nung yokdar. Iba variant ana jenjang sen 13,999 aser sen 15,499 alitsü.

Nokia Power User sangdong ajanga angazükba agi, Nokia G10 aser Nokia G20 smartphone nung 6.38-inch HD+ display angutsü akok. Iba den külemi phone anaprongla nung octa-core MediaTek Helio P22 SoC aser quad rear camera setup angutsü. Iba setup nung 48-megapixel primary camera ka dena lir. Primary shooter nung 2-megapixel depth sensor, 5-megapixel ultra-wide-angle

camera aser 2-megapixel macro shooter angutsü. Kasa sangdong ajanga angazükba agi, iba phone nung 4,000mAh battery den 10W charging dena lir. Nokia G20 ya Nokia G10 ama alitsü, saka MediaTek Helio G35 processor angutsü.

Maneni, Nokia X10 aser Nokia X20 naprongla nung 5G connectivity agütsütsü. Company-i ashiba agi, Nokia X10 - 6GB + 32GB storage model jenjang EUR 300 (sen 25,800) aser Nokia X20 - 6GB + 128GB storage option jenjang EUR 349 (sen 30,000) alitsü. Phone ana rongnung, ka nungbo Snapdragon 480 mobile processor angutsü, koba budget smartphone nung 5G support asütsü atema Qualcomm ajanga yangluba processor ka lir.

Zendaya-i Lola Bunny shilem agitsü



New York, Rongchii/April 04, 2021 (Agencies): Taruba "Space Jam: A New Legacy" nung Emmy award angur actress Zendaya-i 'Lola Bunny' character shilem agitsü terenemba lir. Honibarnü, film indang official Twitter account ajanga cast rongnung la aniokba osang metetdaksü.

"Jam nung @Zendaya pelashishia agizüker," ta Twitter ajanga lemsatep.

Malcolm D Lee-i direct asütsü aliba film ya 1996 Michael Jordan-i tongti shilem agiba cult classic "Space Jam" den tatongtep alitsü. Iba sequel nung NBA superstar LeBron James ya "The Serververse" ta

nüngja agütsüba digital space kati yoker, kong par jabaso (Ceyair J Wright) evil algorithm - Al-G Rhythm (Don Cheadle) ket nungi kümzüksü meranger.

Par jabaso kümzüksü mechi James-i Looney Tunes den longjemer algorithm indang Goon Squad den basketball asaya nung tokteper.

Looney Tunes team nung Bugs Bunny, Daffy Duck, Lola Bunny, Marvin the Martian, Porky Pig aser Roadrunner tem dena lir. Zendaya dak alaka, cast rongnung Khrist Davis, Sonequa Martin-Green aser Cedric Joe nung anisemogo.

Kasa film nung Anthony Davis, Damian Lillard, Klay Thompson, Diana Taurasi aser Nneka Ogumike densema NBA aser WNBA asayartemi shilem tilala agiba angutsü.

EntranceHub
MEDICAL COACHING INSTITUTE

operation MBBS 2021

450
HOURS OF COACHING

10 FULL LENGTH TEST SERIES FROM KOTA

2000+ PRACTISE MCQ

High Score STRATEGY

Admission Open


NEELOPAL SIR
M. Tech (Biotech)


ASIF SIR
M. Tech (Mechanical)


HUSSAIN SIR
M. Tech (Chemical Er.)

CRACK NEET IN 1ST ATTEMPT, STARTS FROM 3RD MAY

♀ BOC | TALK TO US @ 7641007948 | STUDYNEST HOSTEL IN CAMPUS

Office of the

Kelingmen Baptist Arogo Pelaba Lemsateper

Mr & Mrs Imsuinba Kelingmen, par kibongi rongsen tulu tenla agüja, Kelingmen Baptist Arogo nung April 1st - 4th 2021 Revival sentong tulu kaja amangbapur temoatsü tulu ngudakja nüburtem aika taküm melenshidaksüba asoshi par kibong dang Arogoburi kangasa pelaba lemsateper. Tsüngremi par kibong maneni moajangma ta amangbapurtemi sarasademtsur. Ano iba sentong nung Missionary Lima Imsong Unger, speakeri anir par telok ajanga amangbapur temoatsü ngudaksüba asoshi Arogoi kanga dang pelaba lemsateper.

Kibubar wadang nung;
Mr. Jongshimanen Lkr pastor

Govinda dak Covid-19 putet

Mumbai, Rongchii/April 04, 2021 (Agencies): Bollywood actor Govinda dak coronavirus tashidak putetogo aser medical tetuyuba kübok pa kidang quarantine süa mungdar.

Deobar anepdang Govinda dak iba tashidak putet aser tawa tanü pa den ajuruteper ajak dang Covid-19 atema tendangtsü mepishiogo.

"Coronavirus tashidak nungi kümzüka alitsü asoshi, mapang shia Covid-19 atema tendanga aser nüngdakba tekümdangtsü mera ajak nung anidaka aruogo. Ajisüaka, iba wara temaitsü agi tera shirangba sülen, tanü (Deobarnü) kü dak iba tashidak aliba putetogo. Kidang tanüngba adianu aser kinunger ajak negative tendangtet. Tesüiba hopta ishika tejangdang,



kinungtsü - Sunita-a iba tashidak nungi taneptsü nguogo," ta Govinda-i ashi.

"Medical tetuyuba nung anidaka kidang quarantine süa mungdar. Tekümdangtsü mera ajak nung anidaksü aser kati ka asoshi bilemja anepalua yariteptsü mepishir," ta pai shisem.

Jordan indang Prince Hamzah... (Tapak 8 nungi...)



Military Academy nung zünga intet. Pa ya US nung aliba Harvard University nunga azüng aser Jordanian armed forces nunga inyaka liasü.

Pa ya 1999 küm Jordan indang crown prince asütsü shimtet aser King Hussein-i kanga sakloka liasü, shibai yimjak nung teti pa ya kü nuk asüngsang, ta jembia liasü.

Ajisüaka King Hussein asüba mapang pa melentsü asoshi Hamzah ya kanga tanur aser metemjen, ta züngshia liasü.

Jordan nung temaba jenjang nung alir yimten yimsüsür apuba ya kanga bulua majurur.

Prince Hamzah ya asür King Hussein aser pai saklokba kinungtsü Queen Noor na jabaso tambusang lir, shiba UK indang Harrow School aser Sandhurst nung aliba Royal

Anungji pa melen tenu Abdullah ya chuba mendeni atu aser 2004 küm Hamzah nem crown prince nüngja agüja aliba indoktsü.

Iba maparen ya Queen Noor asoshi tejashitsü osang ka liasü, shibai lar jabaso tambusang chuba akumtsü imla liasü.

Mumbai nung IPL ayongzüka asayatsü: MCA

Mumbai, Rongchii/April 4 (Agencies): Delhi Capitals & India left-arm spinner Axar Patel, Royal Challengers Bangalore opener Devdutt Padikkal aser Wankhede Stadium nung ground staff 19 rongnungi ti dak Covid-19 tashidak potetba osang prokshiaka Mumbai Cricket Association (MCA)-i, Mumbai nung IPL-2021 asayatem ayongzüka asayatetsü ta temulung lema bilemer.

"Tang Wankhede Stadium nung nisung ka danga mali, kechiyong Stadium weekend nung shibanga lir. BCCI-i ground staff tem ajak Hombrnü tashidak tendangtsü. Tashidak potetertem kidang temang anepalutsü atema tetuyuba agütsütsü aser tashidak mepotetertem Wankhede Stadium nung anenzüktsü

atema asüngdangtsü. Parnok ya stadium nung bio-bubble nung shilem ka akümtsü, aser iba tetezü IPL Mumbai leg metembang tashi parnok stadium' toktsür maotsü," ta MCA secretary Sanjay Naik-i TOI dang ashi.

"BCCI-i Wankhede nung aliba staff tem anogo ana nung khen tashidak tendangdar. Asayatem ajak bio-bubble ka nung terpranger medeni asayatsü. Mumbai nung asayatem ajak anisüngzüka asayatetsü ta tenangzüka agütsür aser tanga tesemi belener aotsü kecha sentong mali. Mumbai nung ground staff tem kidang nungi stadium-i oli aruli ta public transport nung senzüba mapang tashidak mena asütsü akok. Onoki parnok dang IPL Mumbai leg metembang tashi

Garware Club nung anenzüktsü metetdaktüsü. Wankhede nung practice wickets renema lir aser match wicket tem anogo ana asem tsünga renemtsü," ta MCA ketdangtsür kati ashi.

Ajsüaka MCA secretary-i, Wankhede groundsman ti dak tashidak potetba indang osang tejangja magütsü.

"Tashidak tendangba Hombrnü jangjatsü," ta Naik-i ashi. MCA-isa, Sharad Pawar Academy, Bandra-Kurla Complex aser Sachin Tendulkar Gymkhana, Kandivali nung aliba ground staff tem dang tashidak poteter shilem magitetsüsa akümertem melena inyaktüsü asüngdangtsü akok.

Delhi Capitals, Mumbai Indians, Punjab Kings aser Rajasthan Royals pur tang Wankhede nung training agidar.

Ashleigh Barty-i Miami Open kokogo

Miami, Rongchii/April 4 (Agencies): Honibarnü Miami Open tetsür kija asaya final nung Bianca Andreescu yirur masayatetsüsa akümba sülen world number one Ashleigh Barty-i takok nguogo.

Hard Rock Stadium nung final asaya tanabuba set nung Andreescu tetsü tachichilen teloktep yirur metugu tsünga Australia tsür Barty-i 6-3, 4-0 agi ayong ayonga kokya liasü.

Barty-i service kanga junga aoba den forehand aibelen mesüi asaya-a Canada tsür world number nine asayar ya amokbanger asaya.

Tanabuba set tasembuba game nung Andreescu tetsüng teloktep raksaba sülen court nung alangatok aser asaya idakji

tembang.

Barty-i 3-0 agi asaya koka liasü aser kasa mapang nung Andreescu court nung sadema marakzüteni asayaba nguogo. Andreescu-i tetsüng teloktep alepbanger asayatsü merandang saka mekoki anenadok.

2019 US Open champion Andreescu atema asaya tembanga masayatetba ya kanga tejashitsü ka liasü, shiba 2020 küma season tetzüklen temekok yiruba ajanga ita ishika masayateti liasü.

"Ni bilemba ama asayamung metembang, ajisüaka ni kanga pelar," ta Andreescu-i ashi.

"Mapa tatsüka tsünga mezüngbuba asayamung nung ni final tonga asayatetogo aser

iba atema ni kanga pelar. Ni tanaben asayashi tenzüksü temela masü asü, saka ni kü dak tamang aka aser ni kodanga metoktsür," ta laisa ashi.

"Anungji ni ama shirnoksa timtem ajangshiba mapang ka nung lir, nenok ajak dang peisasa dak maneni tamang ka-ang ta ni shiner," ta Andreescu-i ashi.

Kasa mapang nung Barty WTA Tour tenzüksüba sülen tang mezüngbuba bendanglen asayamung ka nung shilem agiogo.

"Iba ya ni atema tetenzük kanga tajung. Takok anguba season ka asütsü imlaa atar," ta Barty-i ashi, shiba clay court season atema renemshitsü asoshi taruba hopta Charleston nung asayatsü renema lir.

IPL nung Josh Hazlewood masayatsü

Melbourne, Rongchii/April 04, 2021 (Agencies): Aruya aliba Indian Premier League nungi Australia aser Chennai Super Kings fast bowler Josh Hazlewood tukuogo. Taküm nungtugu Ashes aser T20 World Cup asayamung atema renemshitsü tebilemba nung pai IPL nung shilem magitsü lemtet.

Australia nungi IPL nung shilem agitsüpur den külemi ayamesoa aser CSK nung adentsü Hazlewood renemer liasü, saka pai taruba ita ana ya kidang munga item asayamung atema anisüngzüka amungtsü mulungtet. April 09 nungi May 30, 2021 tashi Indian Premier League asayatsü.

Taoba IPL season, koba 2020 küm tatemlen UAE nung ayonga asaya liasü, iba asayamung nung arishi küm 30 tain Josh-i CSK atema asaya asem nung shilem agiogo.

"Mapang balala nung ita 10 tashi bubble aser quarantine nung munga aruogo. Ibayongji cricket asaya nungi khen anisüngzüka aser kidang adianutem den külemi amungtsü ni telemtetba agiogo," ta Hazlewood-i ashi.

"Tsüngküm mongpu mapang, asayamung aika asayatsü lir. West Indies den tour talangka asayaba sülen Bangladesh (T20 tour) den asayatsü. Iba tour temer tatsüka dang lir T20 World Cup aser Ashes atonga asayatsü renema lir. Australia tenüng nungi teti asaya arur asünung, ano tajungtiba nung asayatsü asoshi item asayamung atema renemshia atatsü," ta pai shisem.

Josh-i iba asayamung nung shilem magitsü lemtetba sülen, külem Australia nung Josh Philippe (RCB) aser Mitchell Marsh (SRH) nati iba league nungi tukadokba osang agütsüogo. Ano külen, Australia nung cricket asayar kari iba asayamung nung shilem magitetsü akok, ta sangdong ka ajanga metetdaktüsü.

England tour metenzükdang, taoba küm July ita nungi Australia indang limited over team den Hazlewood-a tenokdangba aika nung anidaka aruogo, kong IPL atema UAE maodang bio-secure lockdown nung pa dena liasü aser UAE tonger sülen-a temzüng tesashi kübok asayartemi anidaka shilem agiogo.

November ita, Josh Australia shilangba mapang, India den Test series atema men's international bubble-i maodang Adelaide kübok hotel ka nung hopta ana atema pa quarantine nung amung.

India team den külemi bubble nung munga arur taküm January tatemlen ka ang tembang aser South Africa tour atema Australia indang Test squad nung Josh aniok asünung, pa tanaben quarantine asütsüsa aküm. Ajsüaka, timtem kar ajanga iba tour thitsütsüsa aküm aser iba mapang nungi domestic level nung pai New South Wales nung asaya arudar.

IPL nungi tukadokba sülen, Hazlewood-i domestic cricket season tatem tashi asayatsü asadangteter. Par team qualify süra, Sheffield Shield final atema pai NSW nung asayatsü teimla lir.

"Bilemba ama ni junga masayateti lir aser bowling yimya melenshitsü nungdaker...tang maparen tera pungba kümogo aser taruba hopta ana tashi asaya aser Shield final tongtetra ni tajungba asayatsü imlar," ta Josh-i ashi.

Asian Weightlifting Championships nung Mirabai Chanu asayatsü

New Delhi, Rongchii/April 04 (Agencies): Aruya aliba Asian Weightlifting Championships asayamung nung taoba mapang world champion Mirabai Chanu-i anir tetsür 49kg category nung shilem agitsü.

Iba asayamung ya April 16 nungi 25, 2021 tashi Tashkent, Uzbekistan nung asayatsü.

Olympic qualifier ama ayonga asayatsü aliba championship nung Asia linük balala nungi nungtugu weightlifter temi shilem agitsü imlar.

Tetsür telemsa nung arishi küm 26 tain Mirabai-i shilem agiba ajanga asayamung tali meraketdaktüsü imlar. Ano külen, tebur telemsa nung arishi

küm 18 tain Jeremy Lalrinnuga-ia shilem agitsü. Pa 67kg category nung asayatsü.

Taoba küm alima ajunga asüngba coronavirus tenokdangba ajanga iba asayamung anogo atsülangtsü aser 2021 küm asayatsü lemtet.

Tashkent tonga arutsü ghonda 72 lia, iba asayamung nung shilem agitsüpur ajak ket nung RT PCR Covid-19 negative report alitsüla.

Asian Weightlifting Federation (AWF) sangdong ajanga angazükba agi, Tashkent airport tonga aruba mapang asayamung nung shilem agitsüpur ajaki Covid-19 tashidak tendangba osang agütsütsüla.

Taoba India table tennis asayar Suhas Kulkarni süogo



Mumbai, Rongchii/April 4 (Agencies): Taoba India table tennis asayar Suhas Kulkarni, Deobarnü Covid-19 tashidak agi süogo. Pa arishi küm 68 liasü. Kulkarni temang anepalutsü atema Kaushalya Hospital-i anir ao, saka tia maka Deobarn anepdang süogo.

Pai kinungtsü, jala, tetsü aser adianutem toktsü iba lima nungi pilaaogo. Par kinungertem ya timba TT aser tanga saisapong nung sendaka lir.

Mumbai nungi ajaki jangjaa

aliba Kulkarni table tennis kibong nung Suhas ya kanga sasapela aketba nisung ka liasü. Pa ya international Nandini teti lir. Pa tenu tanobusang Satish aser Jayant naprongla India tenüng nungi asayaogo.

Asaya nungi anenba sülen pa iba asaya nung coach ama shilem agi aruogo aser iba den National aser International jenjang nung pa Masters' TT tournament tem nung teti shilem agia aruogo.

Novak Djokovic Madrid Open nung shilem magitsü

Rongchii/April 4, 2021 (Agencies): World No. 1 tennis asayar Novak Djokovic, taküm Madrid Open nung shilem magitsü, ta Serbian media sangdong balala ajanga metetdaktüsügo.

Serbia nung asayar shibai February ita Australian Open nung takok nguogo, pa iba clay-court Masters 1000 event nung shilem agitsü imlaa liasü, koba taoba küm Covid-19 wara poktetba ajanga thia liasü. Ajsüaka Grand Slam titles 18 koker alisang-i May 2 nungi 9 nü tashi asayatsü aliba

asayamung nung shilem magitsü telemtetba agiogo, kong pa defending champion lir.

Arishi küm 33 tain asayar shibai Madrid Open asember tashi kokogo aser tatemsa pai 2019 küm final asaya nung Greece nung asayar Stefanos Tsitsipas koka liasü.

Maneni Djokovic-isa, Miami Open Masters 1000 asayamung nung shilem magitsü atema telemtetba agia liasü. Pa tatemsa February ita Australian Open nung shilem agiogo kong pai final nung Daniil Medvedev koka liasü.

BILEMDANGANG

"Shisadangba shia tagitsü keta shisadangtetsüla."